

明詩綜卷十

小長蘆 朱彝尊 錄

長水 杜庭珠 緝評

余堯臣

一首

堯臣字唐卿永嘉人元末自會稽入吳明初謫

濠放還授新鄭丞有菜過集

錢受之云唐卿居會稽越
鎮帥邁善卿參政呂珍羅

致幕下有保越之功無意仕進於越之桐桂里治圃結茆署曰菜過已
而入吳居北郭與里中楊基張羽徐賈王行王彝宋克呂敏陳則釋道
衍爲高啓十友洪武二年授新鄭丞見於啓詩其曰司

馬曰左司必東越鎮將版授之職銜而今不可考矣

靜志居詩話高季迪春日懷十友詩於余司馬堯臣云列戟衛嚴關應
無休沐暇夜飲余左司宅云燈銷月窺闌角警霜委砌答余左司沈別
駕元夕會飲城南詩云故人念我有二子省內郎官府中佐徐幼文菜
過詩題爲永嘉余唐卿左司賦然則左司之稱本於越鎮將版授而司

馬之銜疑唐卿
曾仕於淮張也

秀野軒

濕翠浮草芽空青散木杪輕舟理橫塘歸人渡清曉棲鴉返故巢潛鱗濯新藻倒景澹斜暉廻飈蕩晴昊衡門夜不扃燕坐事幽討落葉秋自飄殘花春嬾埽我欲往從之稅駕苦未早揮手謝孤雲去去沒蒼徼

王行

三首

行字止仲長洲人洪武初爲郡庠經師藍玉延教其子連坐誅有半軒楮園二集

徐子元云行詩清雅弟不及高楊

詩話止仲好談兵游都門人或尼之笑曰虎穴中好休息也既就涼國西塾數以兵法說涼國涼國卒用是敗平居於十友中最契道衍贈之序曰上人非若他人事佛奉師碌碌作沙門者今天下亂已極且必治治然後出於時以發其所蘊其上人之志與當世之人安知終無與上人同其志者盍姑有所待也誦其言亦傾危之士乎至墓銘舉例一書足爲學文者津筏詩非所長也

題趙元臨高房山鍾觀圖

北苑貌山水見墨不見筆繼者惟巨然筆從墨間出南宮實遊戲父子並超軼高侯生古燕下筆蛻凡骨沄沄水墨中探破造化窟嘗圖得鍾觀景象照雲日長松映飛泉霞采互飄歛今朝見茲畫臨寫意無失慘憺入窈冥稜嶒隔岑蔚高堂時一舒六月氣蕭瑟平生丘壑性塵坌欣已拂因之興我懷山中斲苓朮

趙吳興淵明像并書歸去來辭

後更画竹石

虛館坐清曉高秋零露時佳菊秀可餐墨葩含晚滋芳馨發孤思寫此歸來辭餘興猶未已寒玉生疎枝孰謂公子懷不與幽人期撫卷三歎息繫年非羲熙

房山寒江孤鳥圖

千山萬山重復重畫力筆力鬪奇雄青紅蒼翠滿縵素
缺處淺碧分遙峰歷觀畫史每如是意謂此法由來同
昨嘗凌秋潮揚子一舸縹渺乘長風洪波吞天杳無際
出沒但有孤輪紅乃知山水有佳處到此始覺塵埃空
當時海岳應飽見落墨便自超凡庸不將層疊競工巧
遂使氣象齊鴻濛平生愛画惟憇此苦恨妙法無能攻
九州之表有人物意象獨數房山翁茲圖咫尺便千里
小米大米追高蹤愛之歌詠乃常理濡翰自媿言非工
詩成忽復三歎息矯首長望青冥鴻

宋克

一首

克字仲溫吳人明初徵爲侍書出爲鳳翔府同

知

詩話仲溫任俠自喜挾彈走馬學握奇陣法張氏據吳欲致不得闔門却埽工草隸書祝京兆評其書法天授而高侍郎爲作南宮生傳盛譽其詩侍郎又有酬宋軍諮見寄詩云少爲鬪雞兒鮮裘奮春明走馬出飛彈撇捩誇身輕氣服諸俠徒不倚父與兄落花錦坊南美人理妝迎酒酣近五木脫帽呼輸贏及壯家已破狂游恥無成遂尋鬼谷師從之學言兵業成事燕將遠戍三關營奇勛竟難圖廻臨石頭城覽時識禍機不因憶尊羹飄然別戎府震澤還東征恥求薦辟書傲然揖公卿知音竟爲誰四海嗟惄惄又荅仲溫見寄詩云念昔文翰場弱蹤繼清塵鳴絃東閣夜飛蓋西園晨誦之可得其行槩矣惜其詩集罕傳也

秋日懷兄弟

相別幾多時相思淚滿衣家貧經難久世亂得書稀作史余誠拙從軍事亦非鄉心秋塞鴈盡日向南飛

呂敏

一首

敏字志學無錫人元末爲道士洪武初官無錫
縣學教諭有無礙居士集

書雲林畫林亭遠岫

憶過梁谿宅于今二十年賦詩清閟閣試茗惠山泉夜
雨牽離夢春雲黯遠天鄉情與離思看畫共茫然

陳則

一首

則字文度崑山人洪武六年以秀才舉任應天府治中俄進戶部侍郎謫大同府同知遷知府

錢受之云文度文詞清麗元季僦屋授徒以工詩名於吳下禹啓北郭十友之一也

題雲林畫

落花愁殺未歸人亂後思家夢更頻縱有溪頭茆屋在

也應芳草閉深春

孫 賀二十首

賀字仲衍南海人洪武中授工部織染局使出

爲虹縣主簿選入爲翰林典籍復外補平原主

簿罷歸尋除蘇州府經歷謫遼東坐黨禍死有

西菴集

黃才伯云仲衍詩初若不經意而氣象雄渾興喻深致駸
服乎魏晉之風徐子元云嶺南五先生惟仲衍清圓流

麗如明珠走盤不能自定彥舉雄俊豐麗殆敵手也王元美云孫仲
衍如豪富兒郎入少年場輕脫自好歐楨伯云明興五嶺以南五先

生起軼視吳中四傑

李時遠云仲衍豪邁瑋麗足追作者其七言古

體不讓唐人葉處元云先生五七言古風雖唐人不能遠過

曹潔

躬云仲衍善言風景於廣州則云丹荔枇杷火齊山素馨茉莉天香國
於羅浮則云荔枝房櫂倚日開蕊珠樓閣中天起於雲南則云蠻宮見
客花布襖邨婦背鹽青竹籃於武昌則云武昌城頭黃鶴樓飛檐遠映
鸚鵡洲漢陽樹白煙景濕行人如鷗沙際立使未至其地者誦之亦當
神往若酒徒散落黃金空獨卧茆檐夜深雨松花酒熟人不歸瑤草東
風幾回碧風韻不減唐人他如荒蘿遠屋秋夜涼山鬼吹燈冷光濕興

闌移席傍寒梅雙眼如貓對
花碧亦不失爲韓冬郎語也

詩話自贊以下世所稱南園五先生也仲衍才調傑出四人五古遠師漢魏近體亦不失唐音歌行尤琳琅可誦微嫌縟耳集句亦工若秋水爲神玉爲骨芙蓉如面柳如眉遠籬野菜飛黃蝶樅徑楊花鋪白氽去日漸多來日少別時容易見時難三湘愁鬢逢秋色半壁殘燈照病容野草怕霜霜怕日月光如水水如天鶴羣長遶三珠樹花氣渾如百和香可稱巧合繼之者如桂嶺瘴來雲似墨蜀江風澹水如羅風塵荏苒音書絕人物蕭條市井空歸日併隨回鴈盡離魂潛逐杜鵑飛長疑好事皆虛事道是無情却有情綠水青山雖似舊紅顏白髮遞相催此廬陵李楨昌祺所集也如眼前好惡那能定夢裏輸贏總不真東澗水流西澗水錦江春似曲江春雲收雨散知何處燕語鶯啼亦可傷千里關山千里夢一番風雨一番啼慘慘悽淒仍滴霏霏拂拂又迢迢此瓊州丘濬仲深所集也如文章宇宙千年事江漢風流萬古情老去詩篇渾漫與晚來幽獨轉傷神欲知世掌絲綸美肯信吾兼吏隱名縱飲欲謀良夜醉殊方又喜故人來乘舟取醉非難事送客逢春可自由登第往年同座主抱琴何處覓知音疎簷看織蠟蛸網遠信閒封豆蔻花四海交游更聚散十年京洛共風塵漫說簡書催物役猶將談笑出風塵未央樹色春中見茂苑鶯聲雨後新自歎馬卿常帶病也知光祿最能詩春浮玉藻寒波落水滴銅龍畫漏長佳節每從愁裏過遠書忽向病中開江淹采筆空題恨荀令香爐可待熏小院迴廊春寂寂北湖南埭水漫漫敢于世上明開眼莫怪先生嬾折腰苦節難違天子命夢

歸偏動故鄉情舉世盡從愁裏老暮年初信夢中忙酒酣嬾舞誰相拽
客至從嗔不出迎緩帶輕裘成昨夢濁醪麌飯任吾年古來賢達知多
少舊日人民果是非新結草廬招隱逸便應黃髮老漁樵合歡却笑干
年事奉使虛隨八月查復有樓臺銜暮景但將懷抱醉春風故國山川
皆夢寐昔年親友半彫零此長沙李東陽賓之所集也如病身最覺風
露早離夢杳如關塞長此休寧程敏政克勤所集也如一臥滄江驚歲
晚千家山郭靜朝暉嗜酒何妨陶靖節能詩重見謝玄暉此吳江周用
行之所集也如坐看蕉葉題詩句醉折花枝當酒籌闔閨迴臨黃道正
樓臺直與紫微連東風已綠瀛洲草閣道迴看上苑花五夜漏聲催曉
箭千門曙色鎖寒梅雲生紫殿幡花濕月射珠光貝闕寒深院沈沈人
悄悄春風澹澹影悠悠笙歌縹緲虛空裏臺榭參差煙霧中小院迴廊
春寂寂前峰後嶺碧濛濛離岸游魚逢浪返出林幽鳥向人飛雲開日
月臨青瑣花擁絃歌咽画樓晴雲滿戶團傾蓋瀑水侵階濺舞衣此錢
塘沈行履道所集也如念我能書數字至似君須向古人求此上海陸
深子淵所集也如卿月夜臨仙掌動御煙曾見袞龍浮風煙逕起思鄉
夢霄漢長縣捧日心病眼較來猶斷酒新詩改罷自長吟江清露白芙蓉
死雲散天高秋月明蘄竹水翻臺榭濕桐花風軟管絃清胡蝶夢中
家萬里鳳皇聲裏住三年愁將玉笛傳遺恨暗擲金錢卜遠人路遶寒
山人獨去江涵秋影鴈初飛陶令久辭彭澤縣山翁長醉習家池虛心
願比郎官筆感興平吟才子詩漠漠稻花資旅食輕輕柳絮點人衣老
妻畫紙爲摹局童子開軒埽落花細水浮花歸別澗西風落葉掩重門
鳥啼深樹斷靈藥馬飲春泉躡淺沙日落遠波驚宿鴈月明芳戍起啼

鴉共歡天意同人意多說明年是稔年倦客閉門三日雨野橋流水一
犁煙侯門不把馮驩劍客路空攜范蠡圖暮雨自歸山悄悄高樓獨上
思依依閒尋古寺消晴日却聽疎鐘憶翠微日暮酒醒人已遠烏啼花
落水空流清風未許重攜手好月那堪獨上樓魚躍鏡中將綠破烏還
天外帶青來過橋樹葉邨邊合隔岸柴門竹裏開碎心雨夜重檐溜滑
足春融一徑泥此廣州張績

所集也如故里春光榮書錦上林晴

日絢朝衣莫言海上渾無地應是壺中別有家紅樹枝頭聞犬吠寒山
影裏見人家溪邊瑤草含朝露天上珠簾卷曙霞鳥啼雲寶仙巖靜樹
入天台石路新臺上鳳簫秦弄玉鏡中珠翠李夫人閒愁却恐驚巢燕
往事應須問塞鴻楊柳亭臺凝晚翠芙蓉簾幕扇秋紅醉依華屋春多
麗貴想豪家月最明天上吹笙王子晉雲邊度曲許飛瓊淚殘秋雨遺
塵韞腸斷春風爲玉簫蝶粉亂翻迎笑臉柳絲輕舞學纖腰恍疑瓊鳥
翻成夢只是長安不見人別酒不須花底勸淚痕時倚枕函流看花誰
與同攜手好月那堪獨上樓望斷鴛鴦猶未見可憐蜂蝶却先知石窗
花落春歸處山店燈殘夢到時好夢肯隨蝴蝶去離魂暗逐杜鵑飛三
春景色佳期誤半夜雨聲前計非遼砌寒風號絡緝閉門疎雨落梧桐
狂客漫歌金縷曲佳人猶舞越羅衣紅樹暗藏殷浩宅青山空遠仲宣
樓那堪往事空牢落誰共芳樽話唱酬此姑孰夏宏仲寬所集也如山
橫改國三年別江至潯陽九派分兩岸蘆花飛曉雪幾家松火隔秋雲
迢迢霽野雲陰合淅淅疎簾雨氣通風月無情人暗換江山有待我重
來九重霄漢天將近萬轉雲山路更賒武帝祠前雲欲散胡公陂上日
初低此安成王佩

所集也如碧落有情空悵望春山無伴獨相求

山中習靜觀朝槿洞口經春長薜蘿啼鳥歇時山寂寂寒鶴飛盡水悠悠人生有酒須當醉世上浮名好是閒嶺樹重遮千里目故人那惜一
行書此海鹽朱朴元素所集也如紫扉茆屋無人問斷岸寒流到底清歸鳥各尋芳樹去寒潮唯帶夕陽還花開花謝常如此船去船來自不
停流水白雲常自在晚山秋樹獨徘徊茶煙漁火遙如画江水雲山杳莫窮此金華童琥廷瑞所集也如萬里悲秋長作客一官羈絆實藏身
此崑山方鵬時舉所集也如鱸魚正美不歸去瘦馬獨吟真可哀梁間燕子聞長歎樓上花枝笑猶眠勸君更盡一杯酒與爾同消萬古愁此蜀中安磐公石所集也如霜彫碧樹作錦樹色過棲亭又草亭諸葛大名垂宇宙元戎小隊出郊坰殘花爛熳開何益妙舞逶迤夜未休鍾鼎山林各天性風流儒雅亦吾師已聞童子騎青竹喚取佳人舞繡筵休怪兒童延俗客不勞鐘鼓報新晴病軀動覓藜牀坐嬾性從來水竹居庾信羅含皆有宅李陵蘇武是吾師煙絲碧草萋萋長雨裏紅蕖冉冉香萬里相逢貪握手百年多病獨登臺此香山黃佐才伯所集也如歸信幾番勞遠夢愁心一倍長離憂自願勤勞甘百戰莫將成敗論三分此戴天錫維壽所集也如長疑好事皆虛事莫遣佳期竟後期素柰忽
開西子面芙蓉不及美人妝徒勞掩淚傷紅粉但惜流塵暗洞房此劉芳節聖達所集也如世態炎涼隨節序人情翻覆似波瀾笛怨柳營煙漠漠馬嘶山店雨濛濛綠樹碧簷相掩映游絲舞蝶共徘徊人世幾回傷往事愁心一倍長離憂浮生已悟莊生夢未路虛彈貢禹冠敗葉殘
蟬連漢苑古煙高木隔棉州五千里外三年客一寸心中萬斛愁返照入江翻石壁疎松隔水奏笙簧鳥下綠蕪秦苑夕雲凝碧樹諸宮秋此

莆田陳言于庭所集也如念我能書數字至悲君已是十年流新添水
檻供垂釣許坐層軒數散愁此廣州黎民表惟敬所集也如衰草夕陽
江上路漁歌樵唱水邊邨一樽春釀蒲萄綠滿甕秋香竹葉青僧歸黃
葉林邊寺人候夕陽江上舟此

所集也如顧我老非題

柱客凡今誰是出羣雄因知貧病人須棄不露文章世已驚逐客雖皆
萬里去雄豪復遣五陵知獨當省署開文苑未有涓埃答聖朝天子亦

應厭奔走諸公何以答昇平深山大澤龍蛇遠古木蒼藤日月昏此關
中南師仲子興所集也如天下何曾有山水老夫不出長蓬蒿此南海

陳子壯秋濤所集也如朝雲暮雨連天暗野草閒花滿地愁蘭亭舊路
雖曾識子夜新歌遂不傳自歎馬卿長帶病何曾宋玉解招魂追思往

事咨嗟久始覺空門氣味長瑤臺絳節游俱遍粉蝶紅妝畫不成碧落
有情應悵望白雲何處更相期鶯憐勝事啼空巷蟬曳殘聲過別枝大

抵好花終易落爭教紅粉不成灰天長地久有時盡物在人亡無見期
疎櫨看織蠟娟網古木惟多鳥雀聲去日已多來日少他生未卜此生

休珊瑚枕上千行淚白玉壺中一片水不堪紅葉青苔地早是傷春夢

雨天更恨香魂不相遇真成薄命久尋思碧莎裳下攜詩草楊柳洲邊
載酒船春蠶到死絲方盡古柏重生枝亦乾此秀水沈德符景倩所集

也如孤櫂夷猶期獨往崇山瘴癘不堪聞漫說簡書催物役可堪風景
促流年津樓故市生荒草落日深山哭杜鵑幸與野人俱散誕不嫌門

徑是漁樵此萊陽姜塚如農所集也如早春重引江湖興嬾性從來水

竹居千樹桃花萬年藥半池秋水一房山側身天地更懷古獨立蒼茫
自詠詩天下何曾有山水人間豈不是神仙王侯第宅皆新主富貴榮

華能幾時閉戶著書多歲月揮毫落紙如雲煙莫愁前路無知己幾處
蠻家是主人漢家城闕如天上武帝旌旗在眼中此嘉興周賀青士所
集也如芳草有情能下淚野花無語自生愁關門令尹誰相識江上漁
翁未易名一曲正愁江上笛十年如見夢中花世人不識東方朔谷口
空稱鄭子貞獨在異鄉爲異客自憐長病與長貧那知白髮偏能長莫
遣黃金漫作堆爲客馬卿真寂寞依劉王粲本淒涼坐中醉客延醒客
鏡裏今年老去年樹影悠悠花悄悄江蘚漠漠荷田田中郎有女誰堪
託伯道無兒最可憐仙人有待乘黃鶴壯士徒令感白虹啼鳥歇時山
寂寂寒鴉飛盡水悠悠羞將短髮還吹帽共踏清歌又舉尊江上暮鴻
遙送影湖南春草但相思蒼山迢遞成千里明月何曾是兩鄉千里雲
山何處好十年書劍總堪憐波生野水鴈初落風靜寒塘花正開獨坐
黃昏誰是伴每逢佳節倍思親共說陳琳工奏記焉知李廣不封侯水
浮花片知仙路草帶泥痕過鹿羣晚景莫追窗外驥銷憂已辦酒中蛇
此蘭谿胡山天岫所集也予叔父芾園先生亦雅好集句客至觴行恒
舉數聯坐客服其工緻予所記憶者如細推物理須行樂高視乾坤又
可愁庾信羅含皆有宅伏波橫海舊登壇蕭何只解追韓信賈誼何須
弔屈平料得也應憐宋玉不知何處弔湘君能將忙事成閒事不薄今
人愛古人豈有白衣來剥啄便應黃髮老漁樵閣中帝子今何在河上
仙翁去不回謝朓詩篇韓信鐵老萊衣服戴顰家笑拈霜管題詩句閒
向春風倒酒餅野廟向江春寂寂殘燈無燄影幢幢膝王高閣臨江渚
漢主離宮接露臺壺觴須就陶彭澤勲業終歸馬伏波皆
極自然陸務觀所云火龍黼黻手非補綴百家衣者比也

擬古

三首

岐路一尊酒送君今遠行交持未及竟絲管激哀聲冉冉歲華暮悠悠雲氣征馳車戒往路惻惻傷我情我情默已傷歡愛不可忘昔爲春花妍今爲秋草芳秋草芳有時夫君見無期獨宿坐長夜淚落如纏縷白日儻回照孤懷君所知

華月散高樹列曜何參差流光射結綺思婦慘中闌良人涉遠道感歎夜何其清聲發妙曲宛轉有餘哀妙曲固可聽餘哀知爲誰春至桃李妍歲暮華色衰居然獨處廓顧影久徘徊

離離谷中樹燦爛春華芳枝葉何盛茂忽然隨風揚流

光有彫換物理安可常擾擾路傷子哀歌使我傷杪秋
天氣肅白露結嚴霜攬衣不能寐起視夜何長明月出
東壁衆星羅縱橫歲暮鶴鳴百草青自黃遠道者誰
子驅車登太行太行鬱嵯峨天路無津梁興言念同志
涕下霑我裳

寄琪林黃道士

雨絕天景佳前榮樹光綠遙憐採芝侶遠在春山曲琴
歌久已斷酒賦何由續有約今夕同開樽埽茆屋

湖州樂

湖州溪水穿城郭傍水人家起樓閣春風垂柳綠軒窗
細雨飛花濕簾幕四月五月南風來當門處處芰荷開

吳姬畫舫小於斛蕩槈出城沿月回菰蒲浪深迷白紵
有時隔花聞笑語鯉魚風起燕飛斜菱歌聲入鴛鴦渚

白雲山

白雲山下春光早少年冶游風景好載酒秦陀避暑宮
躡青劉銀呼鑾道木棉花落鷺鴟啼朝漢臺前日未西
歌罷美人簪茉莉飲闌穉子唱銅鞮絲華往似東流水
昔時少年今老矣荔子楊梅幾度紅紫門寂寂秋風裏
送何都閩濟南省親至京還廣

伊昔關河事征戰君家嚴君擁方面君拜元戎領大藩
虎旗耀日光於電北山之北南河南鯨波虎壘相嶺巖
轅門上日開將閫白馬朱纓銀作銜軍中呼盧日向午